

Kòrsou, n'unda bo tesoro ta?

E idea tras di un 'self-fulfilling prophecy' básikamente ta bisa nos, ku si nos ta mira o sinti algu di un forma positivo, esaki lo desaroyá su mes tambe di un forma positivo. Resiéntemente den literatura ekonómiko a lanta un área (grupo di ekonomista) proklamando análisis di un ekonomia for di e punto di bista di 'self-fulfilling prophecies'; un idea ku por sierto akadémikamente a trese makro- i mikroekonomia hopi mas seka di otro. Tòg, lòs for di tur teknikalidat sientífiko, si bo pens'é un ratu, e idea aki tin hopi sentido; e echo ku un país manera Merka a yega ekonómikamente mas leu ku hopi otro país na mundu, no solamente tin di haber ku su magnitud, pero tambe, e tin hopi di haber ku su estímulo pa yega su máximo potenshal. Aunke no ta mi intenshon pa huza e artíkulo aki pa duna un kurso purá den ekonomia, sí mi ke korda bo AWE di e importansha di hende í su persepshon pa ku e desaroyo di un país en general i su ekonomia en partikular. Es mas, mi ke alertá bo komo siudadano di e país aki ku bo mentalidat i esun di bo ko-siudadano ta di influensha mayó riba e bienestar sosial i ekonómiko di e país akí.

Pueblo: Hopi biaha nos ta reklamá ku 'kos' na Kòrsou ta malu. Pero, kon nos ke pa kos ta bon, si henter ora nos ta lamentá i proklamá ku e ta malu?! Kon nos ke pa nos hubentut ta mihó si ki ora nos hanya chèns nos ta stigmatísé i tróumatisé?! Es mas, si e hubentut ta malu MES, ta ken ta sirbi komo ehèmpel p'e? No ta e mayornan mes?! Ku otro palabra, laga nos semper buta kosnan den perspektiva. Amor pa bo patria i apresio p'é ta un proseso di desaroyo; nos tempu di desaroyo a pasa! A yega tempu pa un kambio radikal den nos mentalidat i nos persepshon di e país akí i su potenshal. Apesar di kos malu ku por ta pasa riba e isla aki, nos mester rekonosé nos 'bon', premi'é i onré.

M'a skibi e artíkulo aki después ku un siudadano a puntra'mi kiko mi ta kere nos mester hasi pa drecha e ekonomia (situashon) di nos país. M'a pensa hopi kon pa kontestá su pregunta i a yega na realisá ku e solushon ta mas 'simpel' ku hopi di nos ta kere. E artíkulo aki por a bira un estudio akadémiko; tin miyón di modelo ekonómétriko i matemátiko pa kuantifiká e ponensianan ariba menshoná. Pero, pa dos motibu prinsipal mi a skohe pa no komuniká mi idéanan di e forma ei. Na promé lugá, mi miedu tabata ku e estudio ei lo a keda di prònk nèchi den lachi huntu ku tantísimo otro aya na Fòrti. I na di dos lugá, ekonomia ta kai bèk riba rasonamentu lógiko i loke tin den e artíkulo aki ta nada mas ku esei.

Ta pa e motífunan aki mes, mi a skohe pa komuniká ku pueblo di e forma aki. Mi ke pa bo sa ku nos tesoro i nos futuro no ta den fianza di mas plaka o òumento di impuesto o eskoho pa un struktura estatál ultramar o ultrapereférik. Mas bién, e ta den algu hopi mas yegá na nos; e ta den nos kurason. Paso si abo no kere den bo mes, ta ken lo kere den bo?! Pues, laga nos ban pensa i aktua positivo! Laga nos STOP di wak riba otro i bisa 'Tòg nos ta miho ku nan', paso

dia nos keda husgá, nos lo keda husgá pa nos propio échonan i no esnan di otro.
Kòrsou, ban sigui krese i sigui traha, paso si nos karga nos mes di e forma ei,
nos mes í e mundu rondó di nos, lo mira, aún mas, nos balor!

Danki pa e oportunidat.

Atentamente,

Angelino C. G. Viceisza

Kòrsou, Yüni 2003

<http://www.student.gsu.edu/~aviceisza1>